

掌故叢編

第五輯

掌故叢編 第五輯目錄

清仁宗像

影片

攝政王致唐通書

影片

攝政王致馬科書

影片

陳調元參宋權本

王廷諫參宋權本

吏部議陳調元王廷諫參宋權本

杜篤祐參劉顯績本

劉顯績陳說杜篤祐參本

吏部議杜篤祐參劉顯績本

以上六本

廿一至廿七

計七葉

鄂爾泰摺

十八至二十九

計十二葉

年羹堯摺

十至十九

計十葉

英使馬戛爾尼來聘案 二十五至三十一 計七葉

徐述夔詩案附殷寶山案 七至十二 計六葉

西征隨筆 四十一至四十九 計九葉

陳調元參宋權本

禮科右給事中臣陳調元謹題爲聖政方在鼎新大臣不宜濶瀆  
敬循職摘參仰祈聖鑒以別相品以候乾斷事臣竊念內三院之  
設政事之得失取決焉議論之是非待正焉此院臣職也至宋權  
以外撫而驟陞內院其恩遇不爲不隆方丁憂而特蒙眷留其倚  
託不爲不重而權疏首云前日進言實難是欺皇上也茲當聖主  
親政普天大慶果有未議當明白入告及臣接紅本細讀其所陳  
叁款支飾含糊大可異焉敬爲皇上陳之其一言起廢夫起廢盛  
典也權不言於聖旨未行之而言於既行之後既行矣何待權  
言此一可異也其一言會推夫會推誠良法也前科臣杭齊蘇曾  
疏陳之在當時院臣啓請以爲不准行在今日院臣奏請又以爲  
必當行前後異同私心顯然此二可異也其一言巡方至重至大

夫重且大誰不知之當時宋權倡議以爲不用巡按是權定有一段公論以肅憲體以整臺規數月以來權無一言也及昨奉旨會議在權又當有一段確奏以別賢否以悉利弊旬日以來權又無一言也及今而始疏陳巡方語多不可解內云回道管事之官必非無故回道之人夫其故爲何故人爲何人何不據實指名明白入告而朦朧隱濶巧爲避怨之計以結倡議之局聖明之前豈敢有此且權也前者以凶服而與賓興之典不聞以服制自引繼也方出闈而即告葬親之假不聞以國事爲重而欲入告皇上又支飾含糊如此於子爲不孝於臣爲不忠輔佐大臣從無此品格抒誠末議豈有此建白敬摘參上聞伏乞聖斷施行緣係聖政方在鼎新大臣不宜溷瀆敬循職摘參仰祈聖鑒以別相品以候乾斷事理未敢擅便謹題請旨順治八年閏二月二十日

旨吏部議奏

王廷諫參宋權本

兵科給事中臣王廷諫謹題爲輔臣飾詞掩罪虧忠孝之道負特簡之恩祈賜罷斥以清政本事竊惟輔臣與諸臣不同而輔臣宋權又與諸輔臣不同拔諸節鉞登之揆席寵遇可謂隆矣奪其衰經任以機務責成可謂專矣爲臣子者不知當如何捐糜以圖報稱迺五年以來朝乘安車而入暮乘安車而出人趨人諾沉醉爲常絕未聞建白一言匡救一事設非滿漢別輔臣主持其間國是委之何人此其溺職之罪百喙莫辭近見皇上處分諸臣乃魂飛膽落謬以條陳苟且塞責其心術詭譎曖昧與夫首鼠觀望之狀可愧又可憐矣權云官無言責夫繩愆糾謬輔臣事也而諉云無責夫旣無責矣今日又胡爲言之豈昔無責而今乃有責耶權云

前日進言實難夫豈得已夫權乃墨而根王腹心人也阿諛逢迎  
任專陞驟而乃佯卸云不得已其誰欺耶及閱所奏叁款又皆剽  
竊雷同無裨廟謨其曰起廢前詔內山林隱逸之條已詳之其曰  
會推前上傳京官探望之條已悉之至巡方一欸愈令人不解矣  
柒年會議力主停差者權也今云代天子巡狩至大至重既知巡  
方至重且大而胡爲停耶又云不知皇上遣何官是明揣按差將  
復而故以言餽之矣又云凡回道管事之官必非無故回道之人  
夫進賢退不肖輔臣之責何不直指貪廉以佐朝廷澄敍之典而  
乃閃灼變幻模稜兩可權之罪可勝言耶且也親喪關萬古綱常  
即使奪情亦必軍國大事需其贊理而乃入闈取士衣錦披紅是  
亦不可以已乎桃李情濃椿萱恩淡稍有不忍者如是乎既云半  
身不遂自當引分求退而又曰一息尙存敢忘圖報真正貪位慕



祿寡廉鮮恥始之不言以緘默爲苟容之計今日之言又以條陳爲護身之符政聖諭所云借朝廷之官以爲安身之地可謂權之炤膽鏡矣皇上不以臣言爲妄伏乞大振乾斷速賜罷斥以爲不言溺職之戒儻曰投誠有功少爲寬假皇上封前臆後屢賜賞賚已足酬之豈有半身不遂緘口不言終爲輔臣之理臣從朝廷起見故冒犯勢要亦所不恤臣無任竦息待命之至緣係輔臣飾詞掩罪虧忠孝之道負特簡之恩祈賜罷斥以清政本事理臣未敢擅便謹題請旨順治八年閏二月二十日

旨吏部一併議奏

吏部議陳調元王廷諫參宋權本

吏部和碩巽親王臣滿達亥等謹題爲聖政方在鼎新大臣不宜溷瀆敬循職摘參仰祈聖鑒以別相品以候乾斷事考功清吏司



案呈奉本部送吏科抄出禮科右給事中陳調元題前事內開臣竊念內三院之設中略奉聖旨吏部議奏欽此又該兵科給事中王廷諫題爲輔臣飾詞掩罪中略奉聖旨吏部一併議奏欽此欽遵通抄到部送司案呈到部該臣等議得宋權條陳三款果屬雷同且以凶服而入闈取士宜乎科臣之指摘也據疏稱半身不遂既係病軀應准致仕回籍恭候命下臣部行令遵奉施行爲此具本謹題請旨順治捌年三月十六日固山額真公吏部尙書臣譚太固山額真尙書臣朱馬喇太子太保尙書臣陳名夏侍郎臣哈哈木臣雅棲都察院右都御史管吏部左侍郎事兼內翰秘書院侍讀學士臣高爾儼都察院右都御史管吏部右侍郎事臣孫承澤侍郎臣周國佐啓心郎臣馬進納理事官臣穆成格臣杭愛臣佟學文啓心郎臣宜成格臣盧興祖副理臣楊雀祥考功清吏

司郎中加壹級臣金拱敬

旨宋權著致仕回籍

杜篤祐參劉顯績本

吏科左給事中臣杜篤祐謹題爲題明陞補吏都之例並陳科臣  
爭求阻撓之私仰乞聖鑒事竊照吏科都給事中臣杜立德已陞  
太常寺少卿所遺員缺即應移部請補臣查會典開載都給事中  
有缺於左右給事中內陞用此從來正例也後偶有以都調吏都  
者或係朝廷特旨或因左給事中資俸有礙權爲調都六科須知  
之書並前調杜立德之移文手本現在可查今刑科左給事中魏  
象樞資俸相應才望素著立朝侃侃屢有直言此舉朝所共知也  
應陞補吏科都給事中查得會典六科掌印員缺俱該科左右等  
給事中具請臣係吏左移文首先書名職掌所關遵照正例詳議

發咨間不意新陞工科都給事中劉顯績面科中滿漢臣等以資  
深求調又同滿漢諸臣使臣向魏象樞求讓臣思陞者正例調者  
變局也是以我朝陞者多調者少例甚昭然顯績資深俸淺超越  
衆都而言調與資俸相深之杜立德調例不合且六科都給事中  
均係朝廷言路之臣今顯績新陞工都方及一月尙未謝恩不安  
心供職而爭調吏都大非法紀竊念官係朝廷之官豈臣子所得  
自揀擇臣未見其應調處安在雖從來臣科員缺止坐名送部具  
題但事出阻撓牽滯臣一介孤踪止知爲朝廷用人正例斷不敢  
瞻徇以自墮罪戾也除一面將應咨者即議移咨外相應題明仰  
乞聖鑒勅部施行緣係題明陞補吏都之例並陳科臣爭求阻撓  
之私仰乞聖鑒事理未敢擅便順治玖年八月二十七日

旨這奏內事情著吏部察議具奏

劉顯績陳說杜篤祐參本

工科都給事中臣劉顯績謹題爲敬陳公議咨補吏都始末仰祈  
聖鑒事臣衙門中遇吏都缺出例集伍科都給事中公議咨補臣  
叨爲工科都給事中得與聞其事於本月初九日吏科約伍科滿  
官及滿官都給事中公議咨補滿臣云吏都一缺最爲緊要衙門  
舊有兩例今應何從兵科都給事中李運長云我朝此缺有陞有  
調如論調應工科都給事中劉顯績俸雖淺而資最深如孫承澤  
係刑都調吏都杜立德係戶都調吏都如論陞則刑科左給事中  
魏象樞其例俱存是在吏垣酌行之滿州諸臣詳慎復詢之戶禮  
刑三科都給事中其說相同又於二十二日滿漢諸臣復集公議  
發咨吏科左給事中杜篤祐云前朝二百餘年止調三人我清朝  
陞者三人調者二人其調者或左給事中乏人不得已而後調諸

臣云既陞調俱有舊例合無並咨聽吏部酌裁彼時篤祜不肯並咨衆云候二十七日再議此二次公議之始末也今篤祜竟捏詞入告謂臣爲面滿漢諸臣求調臣參公議之末大廷廣衆臣所求何人又謂臣爲同滿漢諸臣使篤祜向魏象樞求讓夫陞調現有兩例方在公議未定爲象樞應陞臣從何求讓滿漢諸臣可共問也篤祜謂臣爲阻撓當時諸臣悉從衙門舊例起見共議陞調並咨取裁於部有何阻撓乎臣本迂拙卽備員工都猶懷覆餗受事之始卽具有清查城工銀兩一疏兢兢供職期盡臣心臣例與公議篤祜誣臣爲爭求阻撓情難默默敢備陳始末於聖明之前伏乞勅部一並察議施行緣係爲敬陳公議咨補吏都始末仰祈聖鑒事理未敢擅便謹題請旨順治九年八月三十日  
旨吏部一併察議具奏

吏部察議杜篤祐參劉顯績本

吏部尙書固山額眞臣朱馬喇等謹題爲題明陞補吏都之例併陳科臣爭求阻撓之私仰乞聖鑒事考功清吏司案呈奉本部送吏科抄出吏科左給事中杜篤祐題前事內開切照吏科都給事中臣杜立德已陞太常寺少卿中略仰祈聖鑒勅部施行等因順治九年八月二十八日奉聖旨這奏內事情着吏部察議具奏欽此又該工科都給事中劉顯績題爲敬陳公議咨補吏都始末中

略伏乞勅部一並察議施行等因順治九年九月初一日奉聖旨吏部一併察議具奏欽此欽遵通抄到部送司隨即移吏科查明去後今據吏科移稱六科滿漢官公同查得工科都給事中劉顯績面科中滿漢臣等以資深求調杜篤祐云那日公議之時劉顯績自言資深該調豈不是求調劉顯績云那日公議之時兵科都

給事中李運長說論陞該刑科左給事中魏象樞論調該工科都給事中劉顯績他資最深劉顯績答云論資深些但望重我不敢當何常說該調求滿漢諸臣又問同滿漢諸臣使臣向魏象樞求讓杜篤祐云那日衆人公議之時我說今日之議還該請左給事中來議劉顯績云舊規皆都給事議例不及左刑科袁懋功云別位不遍及該與魏掌科說知劉顯績說魏象樞是我門孫他也不好說甚麼二十二日又議劉顯績又與魏象樞講門墻說要雙咨豈不是求讓劉顯績云初九日公議畢杜掌科說今日公議之事還該請各科左給事中商議我說舊規皆陸科都給事中議例不及左刑科都給事中袁懋功云只向魏象樞說知我何嘗求讓二十二日又議刑科左給事中魏象樞云前日怎麼議來衆人說前日說有陞有調魏象樞云既說調了罷我說陞調俱有例我與魏



象樞有門牆之義我難道爭此一席衆議並咨了罷這是求讓不是求讓杜篤祐云雙咨我不敢咨恐怕吏部駁了那日公議未定等二十七日再議罷衆人散了衆人又問杜篤祐一介孤踪祇知爲朝廷用人正例斷不敢瞻徇以自墮罪戾那日公議未定誰是徇私的你指名來杜篤祐云衆人俱無徇私衆云衆人旣無徇私你如何說一介孤踪杜篤祐云我是吏科發咨出名的人職掌所關衆人問杜篤祐云如何是阻撓杜篤祐云劉顯績資深俸淺於衆都應咨的不得咨要雙咨豈不是阻撓劉顯績云如發了咨我攔下是阻撓公議未定咨尙未發我怎麼是阻撓各等語據此滿漢官公同查得當日議咨係吏科約各科公議工科都給事中劉顯績原有本科資深一語其該調二字衆原未聞其餘亦皆一時正論吏科左給事中杜篤祐遂以顯績自稱資深及門牆等語爲

求調求讓且公議未定而篤祜遽爾糾參殊屬草率既經移查前來相應備覆等因到部送司相應議覆案呈到部該臣等議得吏科左給事中杜篤祜公議未定遽爾糾參殊屬草率應罰俸一年工科都給事中劉顯績衆原未聞其求調相應免議恭候命下臣部行令遵奉施行緣係題明陞補吏都之例併陳科臣爭求阻撓之私仰乞聖鑒事理臣等未敢擅便謹題請旨順治九年十月十七日吏部尙書固山額真臣朱馬喇侍郎臣佟代太子太保都察院右都御史管吏部左侍郎事臣孫承澤右侍郎兼內翰林弘文院學士臣成克鞏啓心郎臣寧古里啓心郎臣何世泰理事官臣杭愛臣巴黨喜臣楊雀祥臣鍾有鳴副理臣額一兔臣鎮尼考功清吏司郎中加從肆品臣梁清遠

旨杜篤祜當言正理乃奏事不實本當罰治念係言官姑免